

पत्रुसं च्वःगु न्हापांगु पौ म्हसीका

पत्रुसं थ्व पौ रोमी साम्राज्यया एशिया देशया उत्तरपाखे च्वनाच्च्वं पिं परमेश्वरं ल्ययातःपिं मनूतयत् च्वःगु खः। थ्व पौ ईस्वी सम्बत ६४ सालपाखे च्वःगु खः। थ्व पौया मू उद्देश्य दुःखकष्ट फयेमाला च्वं पिं विश्वासीतयत् साहस बीगु खः। ख्रीष्ट सिनाः हानं म्वानावःगु व लिहां झाइतिनिगु भिगु खँ लुमंका बियाः पत्रुसं इमित आशा मत्वःतुसे क्वातुक विश्वास याना च्वँ धकाः साहस बियातःगु दु। इमिगु विश्वास धात्थेंगु खः मखु धकाः जाँचय यायेत हे थज्याःगु दुःखकष्ट वइगु खः, अले ख्रीष्ट हानं झाइबलय् सिरपाः दइ धकाः सीकाः न्ह्याथें ज्याःगु दुःखकष्ट वःसां सहयाना च्वँ धकाः पत्रुसं इमित साहस बियातःगु दु।

नापं, इमिगु चालचलन नं ख्रीष्टयात मानय याः कथं जुइमाः धकाः पत्रुसं इनाप यानातःगु दु।

धलः पौ

न्ह्यखँ १:१-२

परमेश्वरपाखें वःगु मुक्ति लुमंकूगु १:३-१२

पवित्र जुइगु १:१३-२:१०

विश्वासीतयसं छु यायेमाः २:११-४:१९

१. हाकिमतयत् मानय यायेमाः २:१३-१७

२. निम्हतिपूया खँ ३:१-७

क्वमिलु जुइगु व सेवा यायेगु ५:१-११

क्वचायकूगु ५:१२-१४

१ पत्रुस

पत्रुसपाखें ज्वजलपा

1 पोन्टस, गलातिया, कापाडोकिया, एशिया व बिथिनियाय वनाः परदेशी जुयाच्च्वं पिं परमेश्वरं ल्ययातःपिं मनूतयत् येशू ख्रीष्टया प्रेरित पत्रुसयागु ज्वजलपा।

2 न्हापांनिसें ताःतुनादी थें वयकलं धाःथें याइपिं यायेत पवित्र आत्मापाखें छिमित परमेश्वर बाःनं ल्ययादीगु खः। अले येशू ख्रीष्टयागु हिं शुद्ध यानाः छिमित वय्कःयात मानय् याइपिं यानादीगु खः।

परमेश्वरयागु दया माया व शान्ति छिमित यक्व दयेमा।

तःधंगु आशा

3 झी प्रभु येशू ख्रीष्टया बाः परमेश्वर न्हाबलें तःधनेमा। वय्कलं झीत दया माया यानाः सी धुंक्मह येशू ख्रीष्टयात म्वाकाः झीत तसकं तःधंगु व म्वानाच्वंगु आशाया निंति न्हगु जीवन बियादिल।

4 परमेश्वरं वय्कःया मनूतयत् स्वर्गय् गुबलें आशां मघाइगु, न्हना मवनीगु, फुना मवनीगु सम्पत्ति तयादीगु दु।

5 परमेश्वरयात छिमिसं क्वातुक विश्वास यानाच्वंगुलि वय्कःयागु शक्तिं छिमित मुक्ति बियादी। दकलय् लिपा थ्व मुक्ति छिमिगु न्ह्याःने खनेदः वइ।

6 अयजूगुलि छिमिसं आः न्ह्याक्व दुःखकष्ट फयेमाःसां दिक्क चाये मते। लिपा ला छिपिं तसकं लयताय् खनी।

7 थुकिं ला इन जक छिमिगु विश्वास शुद्ध व भिं धकाः क्यनी। स्यनावनीगु लुं ला मिइ तयाः जाँचय् याना स्वइ। छिमिगु विश्वास ला लुं स्वयाः यक्वं भिं। अयजूगुलि येशू ख्रीष्ट झायादीबलय् छिमित नं तःधंकी, च्वय् तइ, अले धन्यपिं धकाः धाइ।

8 वय्कःयात छिमिसं मखंनिसां माया यानाच्वंगु दु। आः नं वय्कःयात छिमिसं मखंनि, अय् नं छिमिसं विश्वास यानाच्वंगु दु। अले धयां मब्याक छिपिं लयतायाच्वंगु दु।

9 वय्कःयात विश्वास यानाच्वंगुलि छिमिगु आत्मां मुक्ति काये खंगु दु।

10 छिमित दइगु थ्व हे मुक्तियागु खँ, न्हापायापि अगमवक्तातय्सं मथुयाः थुइकेत यक्व हे कुतः यात।

11 ख्रीष्टयागु आत्मां इमित ख्रीष्टं दुःखकष्ट फयेमाली, अले हानं तसकं तःधनी धकाः धाःगु खँ अगमवक्तातय्सं गुबलय् व गुकथं जुइ धकाः सीकेत स्वःगु खः।

12 अले परमेश्वरं व अगमवक्तातयत् थ्व खँ इमिगु निंति जुइ मखु, लिपा छिमिगु निंति जुइ धकाः धयादिल। स्वर्ग छवयाहःगु पवित्र आत्मापाखें भिंगु खँ न्यंकीपिन्सं छिमित आः न्यंकाच्वंगु खँयात स्वर्गदूततय्सं आः तकं थुइकेत स्वयाच्वंगु दु।

पवित्र जुयाः म्वानाच्वनेत सःतूगु

13 अथे जूगुलि छिमिसं थःगु मन थातय् लाकाः होश यानाच्चवँ। येशू ख्रीष्ट झायादीबलय् बी तिनिगु परमेश्वरयागु आशिषय् पूरा भरोसा तथा चवँ।

14 वयक्लं धयादी थें च्वनाच्चवँ। न्हापा मस्युनिबलय् याना जू थें छिमिसं आः नं अज्याःगु मभिंगु ज्या याना जुइ मते।

15 छिमित सःतादीम्ह पवित्रम्ह खः। अयजूगुलि न्हागु हे ज्याखँ याःसां छिमिसं भिंगु मनं याना चवँ।

16 थ्व हे खँ थथे च्वयातःगु दु -

“जि पवित्रम्ह जूगुलि
छिपि नं पवित्रपि जुयाच्चवँ।”✧

17 प्रार्थना याइबलय् छिमिसं परमेश्वरयात बाः धकाः धयाजुल। अयनं वयकः ख्वाः स्वयाः मखु, बरु मनूतयसं याःगु ज्याकथं न्याय यानादीम्ह खः। उकिं छिमिसं थ्व संसारय् परदेशी जुया च्वंतले वयकःयात मानय् याना चवँ।

18 छिमि तापाःबाज्यापिनिगु पालनिसें याना वयाच्चंगु ज्यालगय् मजूगु थितिकुति छिमित छुतय् यायेत गुलि मू पुलेमाल, छिमिसं सि हे स्यु। थ्व लुँ वहः थें नाश जुया वनीगु मखु,

19 बरु छुँ हे खू मदुम्ह चीधिकःम्ह भ्याःचा जुयादीम्ह ख्रीष्टयागु तसकं मू वंगु हि न्यानादीगु खः।

20 थथे यायेत परमेश्वरं ख्रीष्टयात संसार सृष्टि याये न्ह्यः हे ल्ययादीगु खः। अयजूगुलि छिमिगु निंति वयकः आः फुक्कसिया न्ह्यःने खंक झाःगु दु।

21 वयक्लं यानाः हे छिमिसं परमेश्वरयाके भरोसा तये फत। स्याये धुंकूम्हयसित परमेश्वरं म्वाकाः तःधंकादिल। थथे यानादीगुलि हे छिमिगु विश्वास व आशा परमेश्वरयाके दयाच्चंगु खः।

22 सत्ययात मानय् याःगुलि छिपि आः शुद्ध जूगु दु। अयजूगुलि छिमिसं दाजुकिजापिन्त माया याना चवँ। अज्जं थःथवय् दुनुगलनिसें माया याना चवँ।

23 छिपि आः नाश जुयावनीपिं मांबौनं बुइकूपिं मखु, बरु परमेश्वरयागु गुबलें नाश जुया मवनीगु वचनं बूपिं खः।

24 धर्मशास्त्रय् थथे च्वयातःगु दु -

“फुक्क मनूत घाँय् थें खः।

न्ह्याक्व बांलाकूसां

इपिं स्वां थें खः ।
 घॉय् सिनावनी,
 स्वां हायावनी ।
 25 परमेश्वरयागु वचन धाःसा
 न्ह्याबलें दयाच्चनी।”☆

छिमित न्यंकूगु भिंगु खँ थ्व हे खः ।

2

भिंपिं जुयाच्चँ

1 अयजूगुलि आर्वनिसें छिपिं मभिपिं मनूत जुइ मते। सुयातं थगय् याये मते, निपाः ख्वाःपाः दुपिं जुइ मते, कर्पिन्त डाहा याये मते, अले मेपिन्त मर्भिकाः खँ ल्हाये मते।

2 नकतिनि बूम्ह मचां त्वनेगु शुद्ध आत्मिक दुस्या इच्छा याःथें छिमिसं नं परमेश्वरयागु वचन ब्वनेगु इच्छा या। अले तिनि छिपिं ब्वलनाः मुक्तिया निंति न्ह्यज्याये फइ।

3 प्रभु भिं धकाः ला छिमिसं सी हे धुंकल।☆

म्वाःगु ल्वहं व ल्ययातःपिं मनूत

4 वयकः मनूतयसं ज्यालगय् मजू धकाः चीकूगु, अयनं परमेश्वरं ल्ययादीगु, म्वाःगु व तःजिगु ल्वहं खः। उकिं प्रभुयाथाय वा।

5 अले छिपिं नं म्वाःगु ल्वहं जुयाः आत्मायागु छँ दनेत ज्यालगय् जूपिं जुयाच्चँ। छिपिं परमेश्वरयात यःकथं येशू ख्रीष्टपाखें पवित्र आत्मां धाःथेंज्याःगु बलिदान बीपिं पुजाहारीत नं खः।

6 थ्व हे खँ धर्मशास्त्रय् थथे च्वयातःगु दु –

“स्व, जिं ल्यया तयागु छगः

तसकं हे थिकेगु

मू ल्वहं सियोनय् तये,

अले उकियात विश्वास याःपिन्सं

लज्या चाये माली मखु।”☆

7 उकिं छिपिं विश्वास याःपिनिगु नितिं थ्व तसकं तःजिगु खः। तर विश्वास मयाःपिनिगु नितिं ला –

“दकःमितयसं
ज्यालगय् मजूगु धकाः धाःगु
ल्वहं हे
कुंयागु मू ल्वहं जुल।”☆

8 हानं मेथाय् थथे च्वयातःगु दु –

“थ्व हे ल्वहँतय्
मनूत लुफि हानाः क्वदइ।”☆

परमेश्वरयागु वचनय् विश्वास मयाःगुलि इपिं थथे लुफि हानाः क्वदइ। अले परमेश्वरं क्वःछिना तयादीगु सजाँय फयेमाली।

9 छिपिं ला ल्ययातःपिं, जुजुया पुजाहारी, पवित्रपिं व परमेश्वरया थः हे मनूत खः। वय्कःयात तःधंका जुइत हे छिमित खिउँथासं वय्कःया अजू चायापुगु जलय् हयादीगु खः।☆

10 न्हापा छिपिं परमेश्वरया मनूत मखु,

आः जुइ धुंकल।

न्हापा छिमिसं वय्कःयागु

दया माया काये मखं,

आः काये खंगु दु।☆

चालचलन

11 यःपिं दाजुकिजापिं, थ्व संसारय् छिपिं कपिं व परदेशीत थें खः। अयजूगुलि आत्मानापं न्हाबलेँ ल्वाना च्वनीगु शरीरया इच्छापाखें तापाक च्वँ धकाः जिं छिमित बिनति यानाच्वनागु दु। झीत यःगु जक ज्याखँ यात धाःसा झीगु आत्मा पापय् लाइ।

12 परमेश्वरयात महमस्युपिं मनूतयगु न्हाःने छिमिसं थःगु चालचलन बांलाका जु। छिमित आः मभिका जूसां खीष्ट येशू झायाः न्याय यानादीबलय् छिमिसं याःगु भिंगु ज्याखँ इमिसं सीकी, अले परमेश्वरयात तःधंकी।

☆ 2:7 २:७ भज ११:८-२२ ☆ 2:8 २:८ यशै ८:१४-१५ ☆ 2:9 २:९ प्रस ११:५-६; यशै ४३:२०-२१; व्य ४:२०; ७:६; १४:२; यशै १:२ ☆ 2:10 २:१० होशे २:२३

हाकिमतयत् मानय् यायेमाः

रोम १३:१-७; तीत ३:१-११

13 प्रभुयात तःधकेत तःधपि मन्तयसं धाःगु मानय् या। व दक्वसिबय् तःधंम्ह जुजु हे थजुइमा,

14 तःधंम्ह हाकिम हे थजुइमा। मभिंगु ज्या यानाजुइपिन्त सजाँय बीत व भिंगु ज्या यानाजुइपिन्त हनेत परमेश्वरं हे इमित छवयाहयादीगु खः।

15 छिमिसं थथे भिंगु ज्या याना हे छुं मस्यूपिं मूर्खतयगु म्हतुप्वाः तिके फयेमा धयागु परमेश्वरयागु इच्छा खः।

16 स्वतन्त्र जुयाच्वेँ। अथे धकाः मभिंगु ज्या याना जुइ मते, बरु परमेश्वरया दासत थें जुयाच्वेँ।

17 फुक्कसित हनाबना तयेगु या। दाजुकिजापिन्त माया या। परमेश्वरयागु ग्याःभय का। जुजुयात हनेगु या।

ख्रीष्टं थें दुःख फयेगु या

18 च्यः भ्वातितयसं थः मालिकं धाःगु खँ न्यनेमाः। भिंम्ह मालिकयागु जक मखु, मभिंम्ह मालिकं धाःगु खँ नं न्यनेमाः।

19 थथे छिमिसं परमेश्वरयागु निति भिंगु ज्याखँ याना नं अन्यायलं जाःगु दुःखकष्ट फये माल धाःसा परमेश्वरं छिमित आशिष बियादी।

20 मभिंगु ज्या यानाः सजाँय फये मालीबलय् सहः यात धाःसा थुकी तःधंगु खँ छु दु धकाः? तर छिमिसं भिंगु ज्या यानाः नं दुःखकष्ट फये मालीबलय् सहः यात धाःसा व परमेश्वरयात नालेबःह जुइ।

21 थथे यायेत हे छिमित परमेश्वरं ल्ययादीगु खः। अयजूगुलि ख्रीष्ट थः हे नमूना जुयाः छिमिगु निति दुःखकष्ट फयादिल। उकिं छिमिसं नं वयक्लं थें याये माल।

22 “वयक्लं गुब्सं नं

पाप यानामदी।

वयक्लं मखुगु खँ

गुब्सं ल्हानामदी।”☆

23 थःत ब्वः ब्यूपिन्त

वयक्लं ब्वः बियामदी।

अय्च्वंक दुःखकष्ट बिलं नं
 वय्कलं ख्याच्वः बियामदी,
 बरु ननिमवासे वय्कलं
 बांलाक न्याय यानादीम्ह
 परमेश्वरयाके भरोसा तयादिल।✧

24 वय्कः थःम्हयसिनं हे
 झीगु पाप क्वबिया
 कूसय् सिनादिल।

अय्जूगुलि झीसं पाप यायेगु मतिइ तकं मतसे
 परमेश्वरयात यय्क भिंगु बांलाःगु जक यानाच्वनेमाः।
 छिमित मुक्ति बीत ख्रीष्ट सिनादीगु खः।✧

25 न्हापा छिपिं तंपिं फैचात थें
 जुयाच्वंगु खः।

आः छिपिं थः जवाः व सुसाःकुसाः
 याइम्हयसिथाय् वय्कः
 नाप जुइत
 लिहां वये धुंकल।✧

3

निम्हतिपूया खँ

एफि ५:२१-३३; कल ३:१८-१९

1 मिसात भाःतं धाःथें च्वनेमाः। थुकिं यानाः परमेश्वरयात विश्वास मयाःम्ह भाःतं
 नं छिमिगु चालचलनं यानाः विश्वास याइ। छिमिसं छुं हे खँ न्येके माली मखु।✧

2 अले इमिसं छिमिगु भिंगु चालचलन व परमेश्वरयात भरोसा तयाच्वंगु खनाः
 हे छिपिं भिपिं खः धकाः सीकी।

3 छिमिसं पिने जक सँ छ्यनाः तिसां तियाः व वसतं बांलाका जुइ मते।✧

4 बरु दुनुगलानिसें क्वमिल्लु व शान्त जुयाच्वँ। थ्व गुबलें फुनावनी मखुगु
 आत्मायागु तिसा खः। थज्याःगु हे परमेश्वरया न्द्वःने तसकं तःजिगु जुइ।

✧ 2:23 २:२३ यशै ५३:७ ✧ 2:24 २:२४ यशै ५३:५ ✧ 2:25 २:२५ यशै ५३:६ ✧ 3:1 ३:१
 एफि ५:२२; कल ३:१८ ✧ 3:3 ३:३ १ तिमो २:९

5 परमेश्वरयात विश्वास याइपि न्हापायापि मिसातयूसं नं भाःतं धाःथे च्वनाः थःत थुकथं हे बांलाका जूगु खः।

6 इपि मध्ये सारा नं छम्ह खः। सारां थः भाःत अब्राहामयात हामा धकाः तसकं मानय् याइगु खः। छिपिं नं साराया सन्तान जूगुलि छिमिसं भिंगु बांलाःगु याना जुइमाः। अले छिपिं नं ग्याये माली मखु।☆

7 अथे हे मिजंतयूसं नं थः कलाः बमलाःम्ह खः धयागु खँ ल्वःमंके मज्यू। छिमिसं नं इमित मानय् यायेमाः, छायाधाःसा परमेश्वरं इमित नं अनन्त जीवन बियातःगु दु। थुकथं छिमित निम्ह जानाः प्रार्थना यायेत छुकिं नं पनी मखु।☆

भिपिं जुइत दुःख सीमाः

8 मू खँ छु धाःसा, छिपिं सकलें छगू मनयापिं, क्वमिलु, दाजुकिजापिं थें थःथवय् माया याइपिं व सकसितं दया माया याइपिं जुयाच्वें।

9 सुनानं छिमित स्यंकल धाःसा वयात स्यंके मते। बांमलाकल धाःसा बांमलाके मते, बरु उकिया पलेसा आशिष ब्यु, छायाधाःसा परमेश्वरं छिमित आशिष बीत सःतादीगु खः।

10 थथे च्वयातःगु दु -

“सुयां न्ह्यइपुक व ताःई तक

म्वाये मंदु ला?

दुसा, थःगु मेयात मभिंगु खँ

नवायेगुपाखें

व थःगु म्हुतुसियात मखुगु खँ

ल्हायेगुपाखें तापाक ति।

11 पापं लिचिलाः भिंगु ज्या या।

शान्तियागु लेंपु त्वःतावने मते।

12 भिंगु ज्या याइपिन्त

परमप्रभुं स्वयाच्वंगु दु,

अले इमिगु प्रार्थना न्यनेत

वयकलं न्हायपं बियाच्वंगु दु,

मभिंगु ज्या याइपिनिपाखें धाःसा

वयकः फस्वयादी।”☆

13 भिंगु जक याना जूसा छिमित सुनानं स्यंके फइ मखु।

14 सुयातं भिंगु याना: नं दु:खकष्ट जुल धा:सा परमेश्वरं छिमित आशिष बियादी।
अथे दु:खकष्ट बीवं ग्याये मते, अले दु:ख नं ताये मते।

15 दुनुगलंनिसें ख्रीष्टयात छिमिसं “प्रभु” धका: मानय् याना च्वँ। छिमिसं याना जूगु आशायागु खँ सुनानं न्यं वल धा:सा छिपिं लिस: बीत न्ह्याबलें न्ह्यचिला च्वँ।☆

16 थथे लिस: बीबलय् हनाबना तया:, मिजासं नुग: यचुका: नवा। थज्या:गु भिंगु चालचलनं याना: छिमित बांमलाका व ब्व: बिया च्वंपिं मनूत थ: हे लज्या चाये माली।

17 परमेश्वरं हे छिमित दु:ख सीके बियादीगु जूसा, छिमिसं मभिंगु याना: दु:ख सीगु स्वया: ला भिंगु याना: दु:ख सीगु हे बांला:।

18 छाय्धा:सा झीत परमेश्वरयाथाय् हयेत ख्रीष्ट नं छक: सिनादिल। पाप हे मदय्कं पापीतयगु नितिं दु:ख फयादिल। वय्क: पृथ्वीइ सिनादिल, अले आत्मां वय्क:यात हानं म्वाकादिल।

19 थ्व हे आत्माया शक्ति कया: कुना त:पिं आत्मातयत नं वय्कलं न्यंक: झाल।

20 नोआं न्यंकूबलय् मनूतयसं विश्वास हे मया:। नोआं जहाज दय्का च्वंतले इमिसं विश्वास याइ ला धका: परमेश्वरं त:न्हु हे पियादिल। संसार लखं जा:बलय् च्याम्ह जक मनूत म्वात, मेपिं फुक्कं सित।☆

21 थ्व आ: छिमित बचय् याइगु ल:या बप्तिस्माया चिं ख:। थ्व म्हया खिति सिला छवयेगु थें मखु, बरु यचुगु नुगलं परमेश्वरया अधीनय् जुइगु ख:। ख्रीष्ट सिना: म्वाना व:गुलिं झीपिं बचय् जुइ।

22 वय्क: स्वर्गय् झाया: परमेश्वरया जवय् च्वनादीगु दु। अधिकार दुपिं, शक्ति दुपिं, व स्वर्गदूतत फुक्कं वय्क:या लहातय् दु।

4

न्हपिं मनूत

1 ख्रीष्टं शरीरय् दु:ख सियादी थें तुं छिपिं नं सीमा:सां लिचिले मते, छाय्धा:सा सुनां शरीरय् दु:ख फइ, वं पाप यायेगु त्व:ती।

2 अथे जूगुलिं आवंलि छिपिं शरीरय् म्वाना च्वंतले परमेश्वरं धा:थें च्वँ। छिमिसं गुबलें थ: य:थें याना जुइ मते।

3 परमेश्वरयात म्हमस्यूपिन्सं याना जू थें न्हापा छिमिसं नं थः यःथें यानाजुइगु, व्यभिचार यायेगु, अय्लाः थ्वें त्वना जुइगु, मोजमज्जा यायेगु, मूर्ति पुजा यायेगु याना जुइ धुंकला।

4 छिपि आः अथे म्वाःमदुगु ज्याखँय् इपिं नाप सना मजूगुलि परमेश्वरयात म्हमस्यूपिं मनूत अजू चायाच्वंगु दु। उकिं इमिसं छिमित मभिका जुइ।

5 इमिसं सी धुंकूपिन्त नं म्वानाच्वंपिन्त नं न्याय यानादीम्ह परमेश्वरयात लिसः बी माली।

6 अयजूगुलि सी धुंकूपिन्त नं न्हापा भिंगु खँ न्यंकूगु खः। म्वानाच्वंबलय् इमित नं मेपिं मनूतयत् थें दोषी ठहरय् यानादिल। इपिं नं परमेश्वर थें आत्माय् म्वाये फयेमा धकाः थथे न्यंकूगु खः।

7 थ्व संसार याकनं हे मदया वनिन। उकिं मन थातय् लाकाः प्रार्थना याना च्वँ।

8 दक्वसिबय् तःधंगु ला, छिपि थःथवय् दुनुगलंनिसें माया याना च्वँ, छायाधाःसा मायां हे न्हागु पापयात नं त्वपुया तइ।*

9 पाहां वःपिं मनूतयत् छिमिसं दुनुगलंनिसें लसकुस या।

10 परमेश्वरं छिमित थीथी कथंया वरदान बियादीगु दु। उकिं थःथपिन्त बियातःगु वरदान छ्यलाः मेपिन्त ग्वाहालि या।

11 नवाइम्हयसिनं परमेश्वरयागु खँ जक नवाना जुइमाः। कर्पिन्त ग्वाहालि यानाजुइपिन्सं परमेश्वरं बियादीगु बलं फक्व ग्वाहालि याना जुइमाः। येशू ख्रीष्टयापाखें छिमिसं फक्क ज्यां परमेश्वरयात तःधका जुइमाः। परमेश्वर न्हाबलें तःधना च्वनेमा। आमेन।

ख्रीष्टियन जुयाः फये मालिगु दुःख

12 यःपिं दाजुकिजापिं, गुबलें मजूनिगु दुःखकष्ट ज्वल धकाः छिपि अजू चाये मते। छिमिगु विश्वास स्वयेत थथे दुःखकष्ट जूवःगु खः।

13 येशू ख्रीष्टं थें थथे दुःख फये दयाः छिपि लयताया च्वँ। वयकः झाइबलय् छिपिं तसकं लयताये दइ।

14 ख्रीष्टयात विश्वास यानाः छिमित हेला यात धाःसा ला छिपिं धन्यपिं खः, छायाधाःसा थुकिं हे छिमिके परमेश्वरयागु तःधंगु आत्मा दी धकाः सी दइ।

15 अयूनं ज्यानमारा, खँ, मभिंगु ज्याखँ यानाजुइपिं, अले कर्पिनिगु ज्याखँय् ल्हाः तः जुइपिं थें जुयाः छता छिमिसं दुःखकष्ट सी मते।

16 ख्रीष्टियनत जूगुलि छिमिसं दुःखसिया च्वनेमाल धकाः छति हे लज्या चायेमाःगु मदु, बरु अथे ब्वःबीकाच्चने दुगुलि छिमिसं परमेश्वरयात सुभाय् ब्यु।

17 परमेश्वरं याकनं न्याय यानादी। दकलय् न्हापा परमेश्वरया मनूतयत् न्याय यानादी। थथे न्हापा झीत हे न्याय यानादी धाःसा भिंगु खँ मन्यंपिन्त झन गज्याःगु न्याय यानादीगु जुइ?

18 धर्मशास्त्रय् नं थथे च्वयातःगु दु –

“धर्मीपि मनूत ला बचय् जुइत
तसकं थाकुइ धाःसा
परमेश्वरयात म्हमस्यूपि मनूत
झन छु जुइगु जुइ?”✧

19 अयजूगुलि परमेश्वरयागु इच्छा कथं दुःख स्युम्हय्सिनं भिंगु ज्या यायेगु मत्वःतुसे सृष्टि यानादीम्ह परमेश्वरयाके भरोसा तया च्वँ।

5

थकालिपिन्त अतीं ब्यूगु

1 जि नं छम्ह मण्डलीयाम्ह थकालि खः। उकिं आम्कन च्वंगु मण्डलीयापि थकालिपिन्त नं थव न्वानाखँ च्वया हयाच्चवनागु खः। ख्रीष्टं दुःख सियाः सिनादीगु नं जिं खनागु दु। येशू ख्रीष्ट झायादीबलय् जि नं वयकः नाप तःधनी।

2 अथे जूगुलि परमेश्वरया फैचातयत् छिमिसं बांलाक हेरबिचार याना च्वँ। करं क्यनाः जक थव ज्या याये मते, छायाधाःसा छिमिसं करं ज्या याःगु परमेश्वरयात मयः। अले हानं धिबायागु निरतिं जक नं थव ज्या याये मते। दुनुगलंनिसें हे प्रभुयात सेवा यायेगु मतिइ दुसा जक या।✧

3 छिमिगु ल्हातय् त्वःता तःपिन्त क्वत्यलेगु स्वये मते, बरु इमिगु न्ह्यःने थः हे नमूना जुयाब्यु।

4 अले लिपा मूलम्ह फैजवाः येशू ख्रीष्ट झाइबलय् छिमिसं गुबलें नाश जुइ मखुगु श्रीपेच कायेखनी।

5 क्वकालिपिं मनूतयसं थकालिपिं मनूतयत मानय् यायेमाः। थथःम्हं तुं तःधं जुया जुइगु बांमलाः। अयजूगुलि ग्वाहालि याये माःपिन्त छिमिसं ग्वाहालि या। थव हे खँ धर्मशास्त्रय् नं थथे च्वयातःगु दु –

✧ 4:18 ४:१८ हितो ११:३१

✧ 5:2 ५:२ यहू २१:१५-१७

“परमेश्वरं तःधंछुना जुइपिनिगु
विरोध यानादी,
क्वमिलुपिन्त धाःसा
दया यानादी।” ☆

6 उकिं छिपिं दकलय् तःधंम्ह परमेश्वरयागु न्ह्यःने चिधंपिं जुयाः च्वाँ। अले वय्कलं छन्हु छिमित तःधंकादी।☆

7 थःगु फुक्क दुःख वय्कःया न्ह्यःने तयाब्यु, छायाधाःसा वय्कलं हे छिमिगु सुसाःकुसाः यानादी।

8 अयनं थःगु मन बल्लाका च्वाँ, होश यानाच्वाँ। छिमि शत्रु, शैतानं छिमित फतिंफतलय् स्यंकेत स्वयाच्चंगु दु। नये मखंम्ह सिंह थें शैतानं नं सुयातं स्यके फइ ला धकाः माः जुयाच्चंगु दु।

9 विश्वास्य बल्लानाः शैतानयागु विरोध या। थ्व संसार्य् च्वंपिं दाजुकिजापिन्सं नं छिमिसं थें दुःखकष्ट सियाच्चंगु दु धकाः छिमिसं सि हे स्यु।

10 थथे दुःखकष्ट सीधुंकाः झी परमेश्वरं छिमित सःताः भिंका व बल्लाकादी। थ्व हे भिंम्ह दया माया दुम्ह परमेश्वरं येशू ख्रीष्टयात झीथाय् छवयाहयाः वय्कः नाप स्वर्ग्य् च्वनेत झीत सःतादीगु खः।

11 परमेश्वरयाके न्ह्याबलेँ शक्ति दयाच्चनेमा। आमेन।

लिपांगु ज्वजलपा

12 विश्वास याये बहःम्ह सिलासयात थ्व पौ च्वाकाः छिमित छवयाहयागु खः। परमेश्वरं छिमित तसकं दया माया यानादीगु दु, अले छिमित भिंका नं दी धयागु खँ छिमिसं सीमा धकाः, अले छिमित साहस बीकथं जिं थथे चिहाकय्क च्वयाच्चनागु खः। अयजूगुलि छिमिसं परमेश्वर नाप च्वनाच्चनेगु त्वःते मते।☆

13 छिपिं थें तुं ल्ययातःपिं बेबिलोनय् च्वंपिं विश्वासीतय्सं छिमित ज्वजलपा धयाहःगु दु। अथे हे जिमि काय् मर्कूसं नं छिमित ज्वजलपा धयाहःगु दु।☆

14 आम्कन च्वंपिं दाजुकिजापिं सकसितं थःथवय् यचु नुगलनिसेँ माया यानाः ज्वजलपा यायेगु या।

ख्रीष्टया मनूत, छिमित शान्ति दयाच्चनेमा।

☆ 5:5 ५:५ हितो ३:३४ ☆ 5:6 ५:६ मती २३:१२; लूक १४:११; १८:१४ ☆ 5:12 ५:१२ प्रे १५:२२, ४०

☆ 5:13 ५:१३ प्रे १२:१२, २५; १३:१३; १५:३७-३९; कल ४:१०; फिले २४

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7